

ԲԱՆԱՍԻՐԱԿԱՆՔ

ՈՐՈՐԱՆ ԵՒ ԴԱՄԲԱՆ

Քող զորրանաւ մանկան խաղաղ ծիրանեգոյն սըփռեալ կայ,
Որ ճօճաւոր 'ի մայրենի ծընդաց 'ի նիրհ քաղցրանոյշ՝
Յերազանայ լուրջ և անմեղ, և հիացմունք նախընծայ
Շող իբր յաստեղց մըշտակայից կաթեն 'ի դէմսն քընքոյշ:

Խորասուզեալ ընդ դալարեզք ծափկի հանդոյն և դամբան.
Փարին ուղէջք ուռոյն զայնիւ երերածուփ վայրահակ
Եւ վարդենւոյն՝ յոր պար գործօն մեղուաց 'ի հոյզ գան և գնան.
Անդ շերմագութ մաղթանք, թըռչնոց անդ դայլայլիւք անուշակ:

Երկաքանչիւրն անըզգայից իսկ են 'ի խոկ մըտայոյզ.
Նոցուն՝ 'ի սիրտ մըտախոհին՝ գոն պահանջից իրաւունք.
Եւ ծանրարթուն ընկըղմեալ՝ կան հատեալ յանդօրր և 'ի յոյս.
Միում հըսկէ մայր ոք ընթեր, միւսումըն խաչ առ անարիւք:

Վարդակարմիր առաւօտուց աւետաւորք են անձնիւր.
Մանուկ 'ի սմա մատաղածին, 'ի նմին է մարդ անկենդան.
Որոցն այն ինչ վարթուցեւոյ մանկան՝ աշխարհ իմն հանուր,
Եւ արդարոյն հանգուցեւոյ շնորհէ զերկինքս դամբան:

ՎԻՈԼՈԾ